

## Batisá e Beibi?

Porfin e beibi a nase. E mayornan ta pensa tokante e edukashon moral i religioso di nan yu. Boutismo tambe ta bin dilanti den e kombersashon. E mama ta konvensé ku nan mester laga batisá e yu i ya kaba a selektá un madrina. Ma e tata no ta asina sigur. Kiko nan mester hasi?

Awendia hende ta kuestioná abiertamente e valides di e rito aki ku ta praktiká pa diferente religion. Ma poniendo tur religion un banda, nos ke opservá loke Dios ta bisa tokant boutismo den Su Palabra Santu, prinsipalmente boutismo di beibi.

Testamènt Bieu a eksigí pa hudiunan sirkumsidá un yu hòmber ocho dia despues di nasementu. Ma ningun Skritura ta preskribí boutismo di beibinan. Beibel no ta indiká ku Juan Boutista a batisá un beibi. Hesus a bendishoná muchanan i beibinan, ma segun nos sa ni Hesus ni e apòstelnan a batisá nan.

Maske Skritura no ta papia tokante boutismo di beibi, nos por komprendé kiko ta Dios Su punto di bista pa ku esaki.

E apòstelnan tabatin ún rekisito pa kada persona ku nan a batisá: e mester konfia Kristo Hesus **promé** pa su salbashon. Pedro a deklará: “*Repentí, i laga kada un di boso wòrdu batisá ...*” Resultado di su predikashi tabata ku “*esnan ku a risibí su palabra a wòrdu batisá...*” (Echunan 2:38,41). Bes tras bes e patronchi aki ta ripití (Echunan 2:41; 8:12,36-38; 16:14-15,31-33; 18:8). Nunka nan a permití boutismo promé ku e persona a konfia Hesus komo Salbador.

Ta klaro bo **mester** konfia Kristo pa salbábo **promé** ku bo por batisá. Si esaki no sosodé promé, e boutismo no ta válido.

Kiko esaki ke men pa ku boutismo di beibinan? Tin dos kondishon pa un persona por aseptá Kristo. 1) E mester tin abilidadat mental pa komprendé sierto echu. E mester rekonosé ku e ta un pekadòr kulpabel dilant Dios (Romanonan 3:23). E tin ku realisá ku Dios hustu, mester kastigá piká (Romanonan 6:23) i e kastigu ei ta fièrnu, separashon eterno for di Dios. E mester komprendé tambe ku e no por salba su mes di e kastigu horibel ei dor di su bon obranan òf dor di ta religioso. Kristo so por salb’è dor di tuma su kastigu na su lugá (Romanonan 5:8). Tur esakinan ta echunan ku e persona mester por kapta mentalmente. No tin nodi di bisa ku un beibi no tin e abilidadat mental pa komprendé esei.

I pa un hende por ta salbá, 2) e mester hasi un desishon konsiente. E mester bira su lomba pa piká i pidi Hesus pa salb’è (Romanonan 10:9-13). Esaki tampoko ta algu un beibi por hasi.

Ta opvio ku boutismo no tin balor spiritual pa e beibi. E mayornan ta batisá nan yu pa motibu di NAN propio kerensia; no e fe di e beibi. E beibi inosente no sa nada.

Algun mayor ta batisá nan yu, keriendo ku esei lo salb’è. Algun ta kere ku boutismo ta kita e kulpa di piká original. Ma segun Beibel ningun hende ta skapa e kastigu ku su piká ta meresé djis pasobra el a batisá. **Boutismo nunka por salba.** Konfiansa den Kristo so por salba. Hesus a primintí e ladron krusifiká huntu ku ne (ku nunka tabatin oportunitat pa batisá) “*Awe lo bo ta serka Mi den Paraiso*” (Lukas 23:43). E tabata salbá pasobra el a konfia Hesus pa salb’è.

Maske kuantu ku nan por ke, mayornan no por hasi desishonnan spiritual pa nan yunan. Un yu no ta salbá pasobra su mayornan a laga batis’è. Kada yu mester hasi su propio desishon pa invitá Kristo pa salb’è di piká. Anto **despues**, komo **evidensia** di e desishon ei, e por batisá.

Talbes bo a batisá—komo beibi òf komo adulto—ma bo nunka a stòp di konfia bo bondat, bo religion, bo deboshon, èts. pa salbá bo, i konfia Hesus SO pa hasi esei. Komprendé bon, Dios lo no aseptá bo pasobra bo a muha un biaha den un rito religioso. Boutismo no por salba. Hesus so por!